

Plataforma Hobennan Profesional 'Tienda di Ley' ta informa:

Ora un tata reconoce su yiu, esei no nifica cu automaticamente e lo tin autoridad paternal

ORANJESTAD (AAN): Den comunidad tin e impresion cu ora bo reconoce un yiu, esaki automaticamente lo nifica cu bo tin autoridad paternal (ouderlijk gezag) como tata.

E impresion y punto di bista aki ta uno erroneo y via e noticia aki, esnan di "Tienda di Ley" na Aruba kier clarifica y ne mesun momento informa ciudadanonan di Aruba con esaki ta hinca den otro.

Na promer lugar ta importante pa subraya cu un tata por reconoce su yiu si e mama permitie y si cumpli cu e otro condicionan mencionan den art 1:204 BWA pa e port a valido.

Segun art 1:203 inciso 1 BWA, e mucha ta worde reconoci door di un akta di nacimiento compila door di e ambtenaar di burgerlijke stand. Na Aruba e recono-



cimiento tin valides desde e momento cu e akta worde traha. Na otro paisnan rond di mundo esaki por diferenciar.

Por ehempel e valides di reconocimiento lo por tin efecto retroactivo desde e nacimiento di e mucha. Loke nos kier pone fñasis riba dje ta cu reconocimiento di un yiu no nifica cu automaticamente bo lo tin autoridad como mayor.

Den e escenario cu e tata ta casa cu e mama na mo-

mento di nacimiento di e yiu, esaki lo nifica cu ambos tin ouderlijk gezag. Den caso di un divorcio, segun nos leyman actual ambos mayor lo mester ta di acuerdo cu continuacion di e gezag. Esaki den principio ta worde considera conflictivo cu art. 6 jo. 8 di Tratado Europeo di Derechonan Humano.

Segun corte di casacion e tata tin derecho di haya gezag sin cu e ta depende di e consentimiento di e mama y sin cu e peticion lo mester

sosode hunto. Loke ta esencial akinan ta, cu e ta na bienestar di e mucha pa e gezag continua despues di divorcio.

Solamente den casonan di excepcion, por ehempel e comunicacion entre e mayornan ta deficiente cu efecto negativo pa e mucha e 'gezamenlijk gezag' lo por worde nenga. Den e version nobo di nos codigo civil si ta tene cuenta cu esaki y e gezag lo continua automaticamente despues di divorcio.

Awor e pregunta ta; con e ta posibel pa tatanan cu no ta casa cu e mama di nan yiu logra haya autoridad paternal? Den principio e ta posibel via dos manera. E promer manera ta segun art. 1:252 inciso 1 di nos codigo civil. Via corte bo por pidi e formulario pa gezamenlijk gezag.

E esencia di e procedi-

mento aki ta cu ambos mayor basa riba un punto di bista mutuo ta dicidi pa comparti e gezag di nan yiu of yiunan. Ambos mayor lo mester yena e formulario y colecta tur e documentonan cu ta worde pidi door di corte. Unabes cu tur cos ta den ordo e verklaring di gezamenlijk gezag lo worde otorga y esaki na su turno lo worde inscribi den registro publico conforme art. 1:244 BWA. Den un escenario cu no tin un deseo mutuo pa comparti gezag di yiu of yiunan di parti e mama ta existi e posibilidad ainda cu e tata por entama un caso pa exige autoridad paternal. Basa riba art. 1:253C BWA tata cu nunca tawatin ouderlijk gezag di su yiu of yiunan por haci un peticion na hues pa por haya esaki. Mayoria di biaha e gezag aki lo por worde otorga na e tata. Pero logicamente tin un excepcion. E gezag lo por worde nenga den caso cu e no ta na bienestar di e mucha pa ambos mayor tin e autoridad riba dje. Un ehempel port a si tin friccion pisa of comunicacion ta hopi deteriora entre e mayornan di mucha.

Colaboradonan y huristanan di Tienda di Ley ta spera cu e articulo aki por a informa comunidad y specialmente tatanan na Aruba tocante con pa obtene gezag di nan yiunan. Den un otro articulo Tienda di Ley lo bay elabora un poco riba tratadonan relaciona cu derecho of proteccion di nos muchanan. Tienda di Ley ta brinda servicio riba diasabra di 3 pm - 5pm na Cas di partido, pueblo di Aruba ta cordialmente invita pa asisti si acaso ta desea asistencia huridico gratis.

Autor di e articulo aki ta Gerick Croes y co-autor Wendrick Cicilia, Studiantenan di Ley.

Yolanda Croes di buki "E Cuebanan Scur" lo ta na Van Dorp Dakota

ORANJESTAD (AAN): Hungando den cura di nan madushi, Didi y su gang ta topa cu un entrada magico pa un otro mundo. Leu bou tera, e muchanan ta haya nan mes ta uza nan propio inteligencia y talentonan special pa sobrevivir.

Y pa wak si nan por salba nan amigonan nobo di un enemigo mortal... prome cu nan mundo caba. Un bunita buki pa muchanan di edad di 10-12 aña. Yolanda Croes ta un autor conoci pa skirbi buki basa riba bida real y esaki ta su di dos buki pa mucha.

"E cuebanan scur" ta un buki di fantasia den e serie "E aventuranan di Didi y su gang". Cu e storianan aki, e autor ta pinta un mundo magico cu palabra y na mes un momento ta pone atencion riba e daño cu invasion di especie por causa na nos naturalesa. Eta laga e heroenan Didi, Ziki y Tim-Tim resolve e problema



aki, na un forma humano y creativo. E buki ta bini cu ilustracion haci door di Armando Goedgedrag.

Diasabra 13 di Juli 2019, Yolanda lo ta presente na Van Dorp Dakota di 11.00 a.m pa 1.00 p.m., pa un session di firma di su buki. Mayornan boso yiu a bay over pasa busca un bunita

buki pe pa e lesa den vakantie. Pues pasa na Van dorp Dakota diasabra awo y combersa un rato cu Yolanda y asina nos promove nos autornan local. De Wit & Van Dorp Stores ta un compania local cu ya ta forma parti di comunidad di Aruba pa mas di 65 aña.